

三不朽圖贊

一
一
册

三
贊

不
朽
圖

江苏工业学院图书馆
藏书章

陶衣寬謹題

重印有明於越三不朽名賢圖贊序

明於越三不朽名賢圖贊者。我鄉張陶菴先生所纂也。閱先達之湮沒。道德儀容不可見於後世。乃與徐楚公登諸賢裔之門。求其遺象。漸積成書。用意蓋勤矣。徒以人事之遷變。因循展轉。歷五十餘年。其外孫陳仲謀乃藏其事。云當明社既屋。士夫羣馳逐風雲。頽首受祿。而越獨多氣節之士。爲可稱也。此書今鮮傳世。王君子餘乃倩李君元昉。鈎摹遺象。鑄諸銅版。形式不爽累黍。而精美過之。並屬徐君呂慈。以李蕓客先生手校本及平景蓀先生羣書輯識詳校之。而又附列陳晝卿先生刻本之異文於其後。且博攷史乘。別錄爲攷異。而次第載諸紹興公報。惜所載僅及四分之一。而公報停止出版。王君設種種方法籌款。而彙印之。雖徐君之攷異。因事中輟。當待諸他日之續印。而李平陳三本之異同。則已列舉之矣。付印之初。王君徵序於余。余背離鄉井幾及十載。五年冬回里。一觀故鄉健者。鮮肯以蓄道德能文章爲鵠。而粗涉法政。銳然以功名自見。則所在多有。豈真有

澄清天下之志夫亦驚於權利而已耳李蕤客平景蓀兩先生著述
等身庶亦立言之選而遺書薶蘊至今未有印本何其急於彼而忽
於此耶王君辛勤料量印此書以行世使讀者知德功言三者初無
所謂軒輊在各因其性之所近而卓然有以自立其有益於世道人
心豈淺尠哉中華民國七年四月十五日蔡元培

越人三不朽圖贊小叙

在昔帝賁良弼卽以圖像求賢。而漢桓帝徵姜肱不至。遂命畫工圖其形狀。古人以向慕之誠。致思一見其面而不可得。則像之使人瞻仰者。從來尙矣。是以後之瀛洲。麟閣。雲臺。凌烟。【平按瀛洲應在臺下】以至香山九老。西園雅集。蘭亭修禊。【平按蘭亭修禊應在香上】無不珍重圖形。以傳示後世。使後之人一見其狀貌。遂無漢武帝不得與司馬相如同時之恨。亦快事也。余少好纂述國朝典故。見吾越大老之立德立功立言以三不朽垂世者。多有其人。追想儀容不勝仰慕。遂與楚公徐子。【李按徐楚公名沁。號水浣。山陰人。平按李亨特紹興府志沁會稽人一號委羽山人。更名若邪。一作邪谿野老又號鏡曲花農。著有越書小纂水箋三卷。續四卷。謝臯羽年譜一卷。謝臯羽游錄注明畫錄八卷。墨苑志三。晉紀行楚游錄香草吟。載花鈴。】沿門祈請。懇其遺像。彙成一集。以壽棗梨供之塾堂。朝夕禮拜。開卷晤對。見道學諸公。則自知有媿衺影。見忠節諸公。則自慚有虧忠孝。見清介諸公。則自恨糾纏名利。見文學諸公。則自悔枉讀詩書。見功業諸公。則自惜空螳梁黍。見厚德諸公。則自警未化貪嗔。如岱輩老慙。則惟恨少壯不努力。老大徒傷悲。若少年英俊。見此圖者。當如文天祥之爲童子時。見學宮所祀鄉先生歐陽修楊邦。【李按邦下脫又字】胡銓諸像。皆諡忠節。【李按歐陽修諡文忠。楊邦又諡忠

襄胡銓諡忠節俱不諡忠節』欣然慕之曰沒不俎豆其間非夫也。『李按此是吉安人鍾同
事見明史本傳同諡恭愍吉安永豐人平按南雷文約蒼水張公墓誌銘曰廬陵之祠四忠一
節文山自許俎豆其列則亦以爲文山語』後生可畏倘能激發意氣砥礪勉旃則吾彙刻此
圖不爲無益矣但願看官加意著眼庚申八月哉生明後學張岱敬撰

陳刻本見道學諸公以下作見理學諸公則惟恐自愧衾影見忠孝諸公則惟恐有忝倫
常見勲業諸公則惟恐毫無建樹見文藝諸公則惟恐莫名寸長以此愧厲久之震懾精
神嚴憚丰采寤寐之地如或遇之其奮發興起必有不知手之舞之足之蹈之者矣予不
幸遭時變稟承家訓恪守師資一時景仰前賢諗知不朽者其名而不可得而共觀者其
像乃與同志爲登門求像之舉諸賢裔鑒其誠而慨然許之或千里而惠寄一像或數載
而未獲一圖積月累時遂完斯帙夫豈直一手足之烈哉至若是書是像之垂示無窮而
終於不朽則所望於後之讀是書者歲在上章渚灘仲秋古劍老人識

有明越人三不朽圖贊序

夫終有明之世三百年來越故大有人哉古劍老人起而圖之贊之以三不朽分著之留形模
以垂範表踐履以作型蓋甚欲不朽其人於後世也顧懷忠履孝植節守廉既欽碩德又何以

不遺細行。理究性命論。切安危。既稱博識。又何以兼錄片言。功勳一世。惠愛羣生。既表宏材。又何以下逮小技。或曰濫矣。然有可稱焉。奚忍湮沒乎。蓋世際滄桑。元黃戰野。采薇而食。於周固稱餓夫。實商之義士也。而後世藉口自晦。則以遺民沒世者。抑又何求其有浮沉觀變。終不得與於微箕之數者。生平才識。又頗淹聲譽。而究其晚節。未爲挺挺也。槩予以不朽。實滋清議。老人又何說之辭。而予曰不然。一生之脩名不立。而末路堪稱。垂老之氣節。或頽而平居自好。如之何以言廢人。以人廢言哉。矧夫議者論其迹。未諒其心。其中或有大不忍者。迄因循老死。而異世譏評。遂多求索。老人所不忍出也。揆老人之心。則曰其非改頭換面者。烏忍棄其所可稱。而不與於圖贊之列。係曰有明著越之多節也。較他郡之馳逐風雲者。越實矯矯也。其餘一材一藝。同是勝國遺老。比王毓著倪舜平輩。特欠一死耳。而一腔忠義。余知多賚志以沒矣。覽老人不朽圖贊。其殆作於平水夢後也。而或有議者。要之無礙於其人之不朽也。又安知不因是而反藉以不朽乎。後六七年。而予竊與於遺議之末。又幸與老人共白此不朽之衷也。噫。乾隆乙亥古重九日。同里許景仁槩子撰。

重刻有明於越三不朽名賢圖贊序

有明三不朽圖贊。吾鄉古劍老人張陶菴先生遺書。與塋公徐子親至各家造門祈請。懇示遺

象而成者。初屬明州蔡爾達刻二十餘象。而先生逝。越四十年。嗣子式宣以未刻五十圖授其甥陳仲謀。力完之。又二十年。蔡氏子仲明亦歸前刻。合成今書。而距先生始事時。世已再傳歲。周撓甲矣。後五十餘年。原槩幾敝。乾隆乙卯。慕村余氏起而補之。一百八象。頓還舊觀。嘉慶庚辰。板歸松山朱氏。梓行未久。逮乎今。茲傳次及予。又一周甲矣。遞授淵源綿延不絕。每更數十年。而一興。向非鬼神呵護有靈。擇人而與。安見其幾閱滄桑。而不同歸煨燼乎。且古劍老人前代之遺賢也。深有見於吾越有明人物之盛。自德行以至文學。代有傳人。而其難能而可貴者。總無逾乎氣節。氣節之重。理學爲宗。是書首列王劉。而卽繼以殉義諸賢者。實出老人感時嫉俗之心。題曰有明猶隱存勝國遺忠本旨。披圖景仰良用撫然。夫古人往矣。極讀書論世之量。恨不文琴日夢。合千載而一堂。得先我而見知者。爲一一省其衣冠。狀其儀表。而舉而示之。使無前不見古人之憾。嗚呼。此非後生小子之幸。與予生道光初。甫離襁褓。先大夫卽出是編。令恭敬瞻禮。由今思之。蓋適當朱氏之重修也。曾幾何時。予年且七十。先訓不可得聞矣。而吉光片羽之留。乃獲重新於小子之手。始願已不及此。猶憶壬午癸未間。居憂里門。訪是書罕知者。倖得一朱氏重印本爲刻。入越中。觀感錄僅存姓。名傳示後起。良自媿矣。今年春。求助於山左中丞張朗齋尙書。頓遂重刊之志。中丞世越人。抑亦關心桑梓。而樂與有成。不自今始者。墜緒

茫茫絕而復續。嗚呼！此又後生小子之幸也。觀是象也，讀是書也，有不感發而興起者與？光緒
戊子三月山陰後學陳錦補勤氏識

乾隆郡志文苑傳陳書卿先生刻本

張岱字宗子。一字陶菴。山陰諸生。曾祖元忭。明隆慶進士。廷試第一。謚文恭。祖汝霖。萬曆間兄弟進士。岱年六歲。汝霖攜之適杭州。時華亭陳繼儒客杭。命岱屬對。奇之。謂汝霖曰。此吾小友也。及長。文思全涌。好結納海內勝流。園林詩酒之社。必頡頏其間。累世通顯。服食豪侈。畜梨園數部。日聚諸名士。度曲徵歌。詼譎雜進。及以古事挑之。則自四部七略。以至唐宋說家。薈粹瑣屑之書。靡不賅悉。及明亡。避亂剡谿山。岱素不治生產。至是家益落。故交朋輩多死亡。葛巾野服。意緒蒼涼。語及少壯穠華。自謂夢境。著有西湖夢尋快園道古奚囊十集等書十餘種。別爲石匱書記。明代三百年時事尤多見聞。年六十九。營生壙於項王里。曰伯鸞高士冢。近要離。故有取於項里也。後又二十餘年卒。年九十三。所著石匱一書。入國朝提學浙江谷應泰購得之。爲明紀事本末梓行於世。語見舊志。邵念魯傳。

越縵堂日記一則

閱張岱宗子有明越人三不朽圖贊。分立德立功立言三門。三門中又各分子目。立德門理學八人。餘姚王文成守仁。山陰王龍谿畿。山陰劉忠端宗周。山陰錢緒山德洪。【緒山本名寬以字行此贊獨稱其名非是明史及紹興府志皆云緒山餘姚人】餘姚徐曰仁愛。山陰季彭山。本山陰張文恭元忬。嵊周海門汝登。【明史言汝登官至南京尙寶卿此云至工部侍郎】忠烈三人。餘姚孫忠烈燧。會稽沈忠愍鍊。【弘光時又諡貞肅】山陰陸忠烈夢龍。【忠烈爲國朝乾隆中賜諡贊言陸公手胸不能戴幘爲他書所未見徐氏秉義忠烈紀實及越殉義傳皆稱明諡忠烈而明史不載】忠節十人。山陰陳節愍性善。【節愍亦乾隆中賜諡弘光時諡忠節】餘姚毛忠襄吉。山陰郁少卿采。餘姚黃忠端尊素。【號白菴】山陰吳節愍從義。【節愍亦乾隆賜諡越殉義傳言魯王贈諡襄敏】餘姚施忠介邦曜。上虞倪文貞元璐。【弘光時諡文正】山陰周文忠鳳翔。【號巢軒弘光時諡文節文貞文忠一作文介順治中賜諡文忠】山陰祁忠惠彪佳。【忠惠乾隆中賜諡魯王贈諡忠毅唐王贈諡忠敏】會稽余忠節煌。【忠節乾隆賜諡】忠諫十人。山陰韓副憲宜可。【號五雲】山陰陳侍郎思道。【號行父】會稽陶莊敏諧。【號南川】山陰汪青湖應軫。【汪先生字子宿官終江西提學僉事明史及府縣

志皆有傳至旋里後縣令爲置綽楔名清風里及其號青湖皆僅見此書】上虞徐大理學詩
【徐公字以言自刑部郎中削籍後起爲通政司參議未至官卒贈大理少卿明史及府志皆
有傳此書言分宜擅政徐首疏參之又言越中四諫自公首難案明史言謝瑜葉經陳紹與徐
稱上虞四諫謝首疏劾分宜在嘉靖十九年分宜爲禮部時次疏在二十一年分宜初入閣時
葉疏在二十年分宜爲禮部時陳疏在二十一年謝疏之後而徐疏直至二十九年俺答入犯
時是四諫徐最在後此書所云皆誤其稱徐號曰龍川亦僅見也】會稽沈梅岡束【贊謂其
在獄時磨斷釘鐵造成一匣張文恭爲作銘曰十九年中郎節十八年中郎匣節耶匣耶同一
轍此他書所未見】餘姚趙端肅錦【明史及府縣志皆云字元樸此稱麟陽蓋其號】餘姚
孫光祿如法【燧曾孫贊謂其長不滿五尺廣頰碧眼見者駭異】餘姚姜光祿鏡【按明史
萬歷十四年二月戶科給事中姜應麟首請建儲自是繼請者百餘人獨無姜鏡名此稱鏡字
翼龍爲禮部郎中首請册立得罪後光宗踐祚晉光祿寺卿考國本之得罪者有禮部郎中于
孔兼員外郎陳泰來董嗣成亦無稱及鏡者蓋可疑也 又案鏡與應麟爲萬歷癸未同年進
士見明進士碑錄又鏡子逢元崇禎時爲禮部尙書加太子太保甚有清望逢元子天樞爲明
工部郎中天樞子希轍爲國朝順天府丞累世清顯所稱鏡請建儲得罪事必由其子孫附會

陶菴與姜氏交好因而載之蓋鏡雖籍餘姚而世居郡城今後觀巷姜氏其後人也前山西冀甯道名枚者由翰林爲御史頗有聲。上虞徐檀燕如翰。稱其所著檀燕山集多踰等身案如翰官大同副使時効方從哲見明史從哲傳此書稱其後官陝西參政而乾隆紹興府志言其巡撫江北以疾乞歸。孝烈五人。蕭山何孝子競。山陰徐孝子允讓。允讓死於元末胡大海圍越之兵事見保越錄當系之元人不應廁入保越錄作徐本道蓋允讓之字。山陰陸孝子尙質。山陰孝女諸娥。新昌石孝女。義烈九人。會稽高節愍岱。節愍爲乾隆中賜諡案明史及府縣志皆言岱當魯王監國時官兵部職方主事此書亦同而入之義烈不入忠節者蓋因其未爲中朝官與葉汝植皆仍以舉人視之故與王潘諸君子等列而目之爲義士又言其爲瀝海所人號白浦皆諸書所未見至岱實殉魯王而勝朝殉節諸臣錄廁之福王殉節之類則誤明史附朱大典傳。高義士朗。節愍子。會稽王正義毓著。山陰倪舜平文徵。會稽葉節愍汝植。此依明史及縣志本書作汝植府志作汝植亦作汝蘇勝朝殉節諸臣錄作汝蘅注一作植節愍亦乾隆中賜諡明史亦附朱大典傳。諸暨傅義士日炯。明史亦附朱大典傳。山陰姚長子。縣志曰獨山人。山陰周義士卜年。山陰潘義士集。二人明史俱云會稽人亦附見朱大典傳府志亦云集會稽人惟越殉義傳及此書皆云山陰人又皆云集聞王正

義死袖石自沉渡東橋是其死在魯王監國之前而明史謂在魯王敗後當是史誤 殉義傳
言集死時年二十五此書云年十九 節烈四人山陰徐烈婦潘氏 允讓妻事亦見保越錄
亦當入元 餘姚貞烈姜寶氏 瑞州府通判姜榮之妾正德六年江西華林盜攻城死節事
詳沈德苻萬歷野獲篇 諸暨余烈婦吳氏 會稽章烈婦金氏 孫忠襄部將章欽臣之妻事
詳全紹衣鮪埼亭外集大金夫人廟碑 章官都督結寨南鎮南疆繹史作章憲蓋其名 清
介六人 餘姚陳恭介有年 餘姚孫清簡 燧之孫汝法父 會稽陶文僊大臨 諸之孫案
文僊有拒奔女事可入盛德 會稽陶恭惠承學 會稽陳新化治安山陰朱泰州公節 剛正九
人 蕭山魏文靖驥 會稽董文簡玘 會稽韓侍郎邦問 諸暨駱副使問禮 明史有傳在隆慶時
官南刑科給事中甚著風節以上面陳十事忤旨貶楚雄知事是當在忠諫之列此云禮科與
史小異又言其字纘亭明史亦失載 蕭山張尙書嶺 山陰蕭副使鳴鳳 會稽羅文懿萬化 會
稽胡通政朝臣 會稽周光祿應事 案府志應中字正甫官止湖廣僉事萬歷野獲編卷二十
言其一字甯宇會稽人由順天籍中進士宰直隸之眞定以強項爲巡撫孫丕揚所劾江陵知
其賢右之後歷官山西湖廣僉事升光祿少卿 盛德十一人 餘姚孫文恪陞 燧之子鑰之
父 會稽陶巡撫大順 大臨兄 餘姚孫參政汝洵 汝法弟 山陰諸文懿大綬會稽王

尙書舜鼎山陰劉布政毅山陰金府丞蘭會稽姚崇明希唐【案府志希唐字德欽官崇明主簿事母甚孝孫應嘉崇禎時官至大理卿會嘉官御史】會稽王御史以甯山陰金伯星樞【蘭子 舊本此下有山陰胡幼恒像及贊】隱遯七人上虞許半圭璋山陰王蛻巖埜會稽陶石梁夷齡會稽章侍郎正宸【格庵當魯監國時官吏部侍郎】會稽余孝節增遠【煌之弟私諡孝節府縣志及思復堂集俱作山陰人】山陰何御史宏仁諸暨余司理綸生孝三人山陰劉孝子謹會稽夏孝子千會稽趙孝子萬全立功門勲業三人諸暨定西侯蔣武勇貴山陰吳尙書兌山陰朱忠定燮元相業二人餘姚謝文正遷山陰朱文懿賡【公節子】功業四人新昌楊恭惠信民山陰張副使天復【元忬父】新昌何尙書鑑新昌呂尙書光洵立言門文學七人諸暨楊鐵崖維禎諸暨王元章冕山陰陳海樵鶴山陰徐天池渭會稽陶文簡望齡山陰王侍郎思任山陰張參議汝霖【元忬子】博學五人餘姚孫尙書鑣【陞少子龍季弟】山陰周雲淵述學會稽董日鑄懋策【玘曾孫】上虞陳府尹絳蕭山來馬湖斯行【此書不言其何官明史畢自嚴傳稱其爲兵部主事趙彥博稱其爲天津僉事魯欽傳稱其爲監軍按察使以疾歸紹興府志言其官終福建右布政使南疆繹史稱其爲膠萊兵備蓋其所歷官馬湖一生以戰功著亦不得以博學目之】畫藝三人會稽朱太僕南雍【府縣志作山陰人】

山陰張郡丞爾葆諸暨陳老蓮洪綬共一百八人皆先繪其像次撮舉其生平大略而系以贊據自序言與徐堃公沿門祈請得其遺像則所繪固皆真容然其中如徐孝子潘烈婦諸娥姚長子章烈婦等未必尙有遺像或不免以意爲之潘義士死時尙少何以便有髭須蔣定西明史言是江都人並非越產何由得此亦皆可疑其所位置頗多未安陽明理學不能掩其功業龍溪學術蓋無足言石簀石梁與王髣髴而一列隱遯一列文學其所抑揚深所未喻倪施諸公殉國之烈豈讓孫陸而忠烈忠節何以區分餘姚陳孫兩家宰正色立朝非僅清節章格庵風力甚著不得以隱遯概之金伯星小善沾沾孫月峯塗抹之學何足不朽至於張氏內山之功【天復】肅之之文【汝霖一字雨若】蓋尤不足比數陶庵欲顯其先概與斯目知其他所稱舉或以姻戚之故不無濫登而山陰徐甫宰之戰功會稽錢文貞之相業章侍郎敞之清節上虞潘太常府之學行何以反見遺漏義興侯鄭遵謙雖行事不甚醇然糾旗舉旅首倡義師歛軀海隅卒於夷滅是亦豪傑之士生氣凜然陶菴闕之或有所諱觀其葉節愍贊於義興頗有微辭是殆有意沒之者【其不及陳元倩太僕蓋以爲杭人故】又考其序題庚申八月時爲康熙十九年滇亡已久而越人之殉永歷者若中湘王何忠誠大學士嚴忠節皆功烈甚偉陶菴或以道遠未得其詳故皆不見著錄其所敘述亦頗有誤如韓宜可官止副都御史而

以爲左都御史姜鏡事無可考當時首請正儲者慈谿姜應麟昭昭在人耳目而歸之於鏡趙端肅官左都御史以惠歸召拜刑部尙書未至卒其先在南京則歷刑禮吏三部尙書而以爲歷官刑禮二部尙書孫汝法贈光祿寺少卿而以爲贈光祿寺卿朱南雍於萬歷八年官太僕寺卿其罷歸當在是時而謂因太子出閣講學玩其畫扇不聽書爲講官所言罷官神宗卽位幼冲時方講學安得更出閣之太子蓋觀扇者卽是神宗而鄉俗誤傳以爲太子陶菴因而載之耳要之是書搜羅潛曜具費苦心先正衣冠儼然可接較之會稽先賢傳會稽典錄諸書尤爲有功桑梓先君子嘗欲續爲之刻未果予十餘年前聞是書板藏南街余氏已多殘缺其家貧甚待售曾屬孫子九徐葆意兩君訪購之而余氏有無賴子已竊以償博負遂不得今亂後不知何如矣